

## Икки улуғ шоирга бағишланган халқаро илмий семинар

2021 йилнинг 15 июнь куни "Барча замонларнинг буюк шоирлари Низомий Ганжавий ва Алишер Навоийнинг ҳаёти ва ижоди: ўхшаш тақдирлар" мавзуида халқаро илмий семинар бўлиб ўтди. Ушбу халқаро нуфузли илмий анжуман ТИҚХММИ "Гуманитар фанлар" кафедраси томонидан ташкил этилди. Унда Озарбайжон Миллий Фанлар академияси Тарих ва Адабиёт институтлари, Боку давлат университети, Озарбайжон миллий консерваторияси ва бошқа университетларнинг таниқли олимлари ҳамда Ўзбекистон Миллий университети, Низомий номидаги Тошкент давлат педагогика университети, Махпират номидаги Марказий Осиё халқлари тарихи институти, Турон Фанлар академияси, Камолиддин Бехзод номидаги Миллий рассомлик ва дизайн институтларининг профессор-ўқитувчилари иштирок этиб илмий маъруза қилдилар.



Хусусан, Озарбайжон Миллий фанлар академияси профессори, тарих фанлари доктори Маис Амрахов «Слава начинателю Низами и продолжателю Навои», Низомий Ганжавий номидаги Адабиёт институти бўлим мудирини, филология фанлари бўйича фалсафа доктори Тəhminə Vədəlova "Nizami Gəncəvinin "Məxzənül-əsrar" məsnəvisində tarixi şəxsiyyətlər, Боку давлат университети "Туркология" кафедраси мудирини Рамиз Аскар "Алишер Навои на азербайджанском языке", Озарбайжон Адабиёт институти "Озарбайжон-Туркменистон-Ўзбекистон алоқалари" бўлими мудирини, филология фанлари доктори Алмаз Увли Биннатова "Əlişir nəvainin şəxsiyyəti haqqında ilkin qaunaqlar", тарих фанлари бўйича фалсафа доктори Нигар Ахундова «Низами Гянджеви-великий сын азербайджанского народа-в произведениях художников и скульпторов», филология фанлари доктори, профессор Tərlan Quliyev «Zəhirəddin Məhəmməd Babur və Nizami Gəncəvi» каби мавзуларда илмий маърузалар қилдилар. Шунингдек, ЎзФА Тарих институти, институтимиз ва бошқа олий таълим муассасаларининг профессор-ўқитувчилар ҳам Низомий Ганжавий ва Алишер Навоийнинг ҳаёти ва фаолиятига оид маърузалари билан чиқишди.



Маърузалар давомида озарбайжонлик олимлар Алишер Навоий, Ҳусайн Бойқаро, Заҳириддин Муҳаммад Бобур ва бошқа буюк аждодларимиз тарихига оид салмоқли илмий ишларини тақдим этдилар. Бундан шундай хулоса қилиш мумкинки, Озарбайжонда Ўзбекистон тарихини ўрганишга алоҳида эътибор қаратиб келинади. Бу халқаро илмий семинар Вазирлар Маҳкамасининг 2021 йил 8 февралдаги 24/15-83 сонли топшириғига асосан ташкил этилди. Ушбу ҳужжатда Озарбайжон республикаси илмий марказлари, олий таълим муассасалари билан тўғридан-тўғри ҳамкорлик алоқаларини ўрнатиш, ўқитувчилар алмашинувини йўлга қўйиш, маъруза, семинар ва маҳорат дарсларини ташкил қилиш, илмий журналларда мақолалар чоп этиш, конференция ва илмий-амалий анжуманларда иштирок этиш вазифалари белгиланган. Ушбу халқаро илмий семинар юқори савияда ташкил этилди ва бу ишлар келажакда давом этади.



**ТИҚХММИ матбуот хизмати**